

## Ho Etsa se fetisang Khopolo



---

### SABATHA THAPAMA

#### **Bakeng sa Thuto ea Beke ena Bala:**

Esa. 50:4–10, Esa. 52:13–53:12, Esa.53:3–9, Esa. 53:10–12.

#### **Temana ea Khopolo:**

“Athe o hlabetsoe libe tsa rōna, a tetekoa ka baka la makhopo a rōna; kotlo e re tlisetsang khotso e mo oetse holimo, 'me re pholosoa ke maqeba a hae” (*Esaia 53:5*).

**L**ough Fook, le-China la Mokreste, o ile utloela bomphato oa hae bohloko bao e bileng makhoba merafong ea Afrika. O ne a batla ho ba fa tšepo ea Evangeli, empa a ka etsa joalo joang a sa khone ho ba fihlela? Tharollo ea hae e ile ea ba ho ithekisa nako ea lilemo e le lekhoba. O ile a isoa Demerara, moo a ileng a tsamaea le merafo ho bolella basebetsi 'moho le eena ka Jesu.

Lough Fook o ile a shoa, empa pele batho ba 200 ba lokolloa ho hlokgeng tšepo ka ho amohela Jesu e le mopholosi oa bona. Boinehelo bo joalo bakeng sa molemo oa batho ba bang! Ka hoo etsa se fetisang khopolo, ke hore, ka boikokobetso “a nka sebopeho sa mohlanka” (Ba-Fil. 2:7), Jesu le eena, o fihletse ba sa fihleloeng—'na le uena le lefatše lohle le neng le tebile le ho hlahela sekoting sa sebe. Bekeng ena, re tlo bona ketsahalo ena e hlollang e porofetiloeng makholo a lilemo pele e ka etsahala.

*\*Ithute Thuto ea Beke ena ho lokisetsa Sabatha sa la 6, Tlhakubele.*

## ’Nete ea Esaia e Hlahlobang (Esa. 50:4–10)

Ha e ne e ba Esaia o ne a rerile ho fetisa fela litaba, o ne a tla beha lintlha tse malebana le Messia fatše hang. Empa e le hore a rute, le ho susumetsa, le ho nea bamameli ba hae hore ba teane le Mohlanka oa Jehova, o hlahisa taba ena ka lihloho tse iphetang ka mokhoa oa papiso. O manolla molaetsa Molimo ka likhato e le hore ntlha ka ’ngoe e tle utloahale malebana le taba kakaretso. Esaia ke setaki seo lebota la sona e leng moea oa momameli.

**Baka Esaia 50:4–10. Akaretsa seo litemana tsena li se bolelang. U bona Jesu joang sekheng see?**

---

Re fumane ho Esaia 49:7 hore mohlanka oa Molimo oa nyelisoa, oa nenoa, le ho ba “mofu oa babusi” empa hore “‘Marena a tla ’mona, a eme; mahosana a tla khumama pel’a hae’”. Mona Esaia 50, re ithuta hore khohlo e tebile bakeng sa tichere e mosa ho khothatsa ba khathetseng (Esa. 50:4). Tsela e isang phetetsong e feta hara mahlomola (Esa. 50:6).

Tlhekefetso ena e utloahala e le mpe ho rōna ba phelang setsong sa bophirimela sa joale. Empa setsong sa bochabela, tlotla e ne e le taba ea bophelo le lefu bakeng sa motho kapa sehlopha sa hae. Ha e ne e ba rohakile le ho hlekefetsa motho e mong joalo, o ne o lokela e be o sireletsehile hantle; ha e ne e ba ba ka fumana sekoto sa nako fela, phofu kapa bahabo kaofela ba ne ba tla iphetetsa.

Morena Davida o ile a hlasela le ho hlola naha ea Ammone (2 Samuele 10:1–12) hoba morena oa teng a “tšoare bahlanka ba Davida, a ba beola litelu ka ’nga e ’ngoe, a seha le liaparo tsa bona ka lehare ho isa lethekeng, a ba a ba khutlisa ba le joalo” (2 Sam. 10:4). Empa ho Esaia 50 batho ba otlala mohlanka, ba mo hlotha litelu, le ho mo tšoela ka mathe. Se etsang hore liketso tsena e be tsa lefatše lohle, ke hore phofu ke mohlanka oa morena oa Marena. Ha e le hantle ka ho bapisa Esaia 9:6, 7 le Esaia 11:1–16 le likha tse ling tsa “mohlanka”, re fumana hore mohlanka ke Morena, molopolli ea matla! Empa ka tlotla le matla ana ohle, ka baka le sa tsejoeng, Ha a ipholose! Sena se ea makatsa hore batho ha ba ka ba se lumela. Sefapanong sa Jesu, baetapele ba mo soma:

“O pholositse ba bang; ha a ipholose le eena, ha e le eena Krete, mokhethoa oa Molimo!” (Luka 23:35); “‘Ha a theohe sefapanong hona joale, ’me re tla lumela ho eena’” (Matt. 27:42).

**Bala Esaia 50:4–10. Ngola fatše lintlha tsa semoea tse boletsoeng mona tse lokelang ho kenngo a maphelong a rōna. A ko ichebe u ipapisitse le lethathamano le o le entseng. Ke likarolong life moo u ka etsang betere? Ha e ba u nyahama, tsoela pele u bale bolelang ba beke.**

## Thoko ea Mohlanka ea Mahlomoleng

(Esa. 52:13–53:12)

Esaia 52:13–53:12, e tsejoang ka hore ke “thoko ea mohlanka ea mahlomoleng,” e tiisa botumo ba Esaia e le “moporofeta oa mo-Evangeli.” Ka tumellano le botle ba Evangeli, thoko e fetisa lingoloa tsohle. Leha e le khutšoane haholo, polelo ka ’ngoe e fupere moelelo o matla o senolang khubu ea takatso ea Molimo ea ho pholosa moloko o oeleng le ho lahleha sebeng.

Hona ha se “lebese” la lentsoe la Esaia. O lokisitse phutheho ea hae ka ho holisa sehlooho sa Messia ho tloha qalong ea buka ea hae. Ka ho latela mosebetsi oohle oa Messia lefatšeng, moporofeta o qalile ka tsoalo ea hae (Esa. 7:14), a hlalisa boleng ba Hae joalo ka Khosana ea Davida (Esa. 9:6, 7), a hlalosa haholoanyane ka mosebetsi oa hae oa nchafatso bakeng sa Iseraele (Esa. 11:1–16) le bosebeletsi ba hae bo khutsitseng ba hae ba tokoloho ho hlokeng toka le mahlomoleng (Esa. 42:1–7). Joale Esaia o senola hore pono e kholo ea Messia e kenyeletsa khohlano ea tlokotsi e etelloang pele ke boikhohomoso (Esa. 49:1–12, Esa. 50:6–10). Joale thoko ea mohlanka ea mahlomoleng e fana ka botebo ba tlokotsi.

**Khutlela likarolong tseo tse thathamisitsoeng sekheng se ka holimo. Hlahloba hape seo li re bolellang sona ka Messia, Jesu. Li re thusa joang ho re lokisetša se tlang ho Esaia 52 le 53? Kapa li mpa li etsa hore se etsahalang ho Esaia 52 le 53 e se hlolang ka ho fetisisa?**

---

Esaia 52:13–53:1 e lelekella thothokiso ka pono e fupeng papiso e hlolang: Mohlanka o tla atleha le ho phahamisoa, empa ponahalo ea hae e senyeha hoo a ke keng a tsejoa. Ke mang ea ka molumelang? Esaia 53:2, 3 e qala ka bohloko bo tlohang tlhahong ea Mohlanka le ponahalang ea hae bohlokong le tatolong ea hae. Esaia 53:4–6 e khufufatsa hanyane ho hlalosa hore mahlomola a hae ruri ke kotlo ea rōna, eo a e jereng ho re folisa. Esaia 53:7–9 e tsoela pele ho hlalisa ho theohela lebitleng ha mohlanka ea se nang molato. Ho Esaia 53:10–12, mohlanka o nyolohela moputsong o phahamisitsoeng o ileng oa bonoa qalong ea thothokiso ho qala ho Esaia 52:13, ka leseli la hore sehlabelo sa hae sa ho re boloka ke thato ea Molimo. Bapisa thothokiso ena le pono ea khohlo ea Ba-Filipi 2:5–11, moo Jesu a qalang ka sebopeho sa Molimo empa a theoha ka ho ifelisa ka ho nka sebopeho sa batho, a ikokobetsa le ho isa lefung, le ho isa lefung le nyelisehang ka ho fetisa: lefu la sefapano. Ka hona, Molimo o mo phahamiselitse holimo e le hore bohle ba mo amohele e le Morena (bapisa Esa. 49:7).

**Bala Esaia 52:13–53:12. Ngola fatše sohle seo thothokiso e se bolellang ka seo Jesu re etselitseng sona. Lula ho seo liketso tseo li se bolellang bakeng sa rōna.**

## Ke Mang ea Lumetseng? (Esa. 52:13–53:12)

Ho Esaia 52:13 mohlanka oa Molimo o phahamisitsoe haholo, empa ntle le tlhokomeliso, temana e latelang e hlalosa ponahalo ea hae e le ea a senang sebopeho hoo a kekeng a tsejoa e le “e mong oa bara ba batho.” Testamente e Ncha e hlalosa lintho tse sentseng ponahalo ea Jesu, ho kenyeletsa mahlomola, moqhaka oa meutloa, ho thakhisoa, empa ka holimo ho tsohle, ho jara libe tsa moloko oa batho. Sebe ha se so ka se rereloa ho ba tlhaho ea batho; ho se ja ho entse hore “Mor’a Motho” a be mahlomoleng a maholo.

Bapisa sena le pale ea Jobo, eo hang a ileng a oela ho tloha boemong ba maruo a maholo, le hlomphe, le matla, ho ea tlase moo a neng a lutse fatše moloreng a ingoaea liso tse bohloko ka lematjana (Job 1, 2). Phapano e ne e le kholo hoo le metsoalle ea Jobo e ileng ho mo tseba lekhetlong (Jobo 2:12). Potso le hore: Hobaneng ha Jobo a le mahlomoleng? Hobaneng Messia oa Molimo a utloa bohloko? Ho ne ho se eo bo mo loketseng. Bobeli ba ne ba se na molato. Joale hobaneng ba utloa bohloko?

**Bala litemana tsa kajeno le ho ngola fatše libaka tseo sehlooho sa ba utloang bohloko ba se na molato se hlahang. Ke molaetsa ofe oa bohloko moo ho rōna?**

---

---

---

---

---

Sheba potso ea Esaia 53:1. Lipotso tsena li tiisa qholotso ea ho lumela tse sa lumeloeng (bapisa le John 12:37–41) le ho re hlokomelisa ho lula fatše bakeng sa pale eohle. Empa lipotso hape li na le boipiletso. Boemong bona, ho tšoana ho lipakeng tsa lipotso tse peli ho bolela hore letsoho/matla a Morena a topollo (bapisa le Esa. 52:10) a senoletsoe bao ba lumelang tlaheho eo. Na u batla ho ba le maiphihlelo a matla a Molimo a pholosang? Lumela tlaheho.

**Sheba ka hloko ho Esaia 53:6. Molaetsa o tobileng ke ofe? Temana eo e reng ho uena, u le motho, e lokelang ho u fa tšepo ho sa natsoe libe li ho hloleha ha hao ha nako e fetileng?**

## Ba sa Fihleleloeng Ke Rōna! (Esa. 53:3–9)

Joalo ka setlama se tlokotsing, se senang boleng bofe kapa bofe, le nyelisa (Esa. 53:2, 3)—ke boleng bo re bo fuoang bakeng mohlanka ea mahlomoleng. Esaia ka potlako a re fetisa bocheng ba hae ho isa lintšing tsa sekoti. Le ka selelekela se fanoeng pejana, ntse re sa itokisetsa ka tselo ea hore qetello ea mohlanka ha re na taolo holima eona. Ka hlakoreng le leng! Esaia o re rutile hore re amohele ngoana eo re mo tsoaletsoeng, khosana e phahameng ea khotso. Ba bang ba mo nyelisitse, empa rea tseba hore na ke mang haele hantle.

Joalo ka ha motho e mong a boletse: “Re kopane le sera, ’me ke rōna.” Mohlanka ha se eena oa pele oa ho nyatsoa, ho nenoa kapa motho oa mahloko. Morena Davida o ile a apareloa ke tseo tsohle ha a ne a baleha pel’a mor’a hae Absalome (2 Sam. 15:30). Empa mahloko a jeroeng ke mohlanka enoa ha se a hae, ’me ha a tsoaloe ka sebe sa hae. Kapa hona ho a jarela motho a le mong ea itseng; “Morena o ’melesitse makhopo a rōna ohle” (Esa. 53:6).

Karabo potsong ea “Hobaneng?” ke ’nete ea Esaia e re behang hlahlobong: Hobane Molimo o lerato, Messia oa hae o tla ikhethela ho ba mahlomoleng. Empa hobaneng? Esaia o betsa molamu oa qetela ho phethela ’nete eba e ka holimo ho khopolo ea motho: O tla khetha ho utloa bohloko e le ho fihlela ba sa fihleloeng, ’me bao ba sa fihleloeng ke rōna!

Ba sa utloisiseng ba nka mohlanka “e le ea otloang ke Molimo” (Esa. 53:4). Joalo ka ha metsoalle ea Jobo e ile ea nahana hore sebe sa hae ke sona se bakileng tsietsi ea hae, ’me joalo kaha barutuoa ba Jesu ba ile ba botsa “‘Ho sitiloe mang, monna eo, kapa batsoali, hore e be o tsoetsoe a foufetsa?’” (John 9:2), ba boneng Jesu sefapanong ba ile ba ba nahana ho hobe. Na Moshe ha a re “ea fanyehiloeng sefateng o rohakiloe ke Molimo” (Deut. 21:23; bapisa Num. 25:4)?

Empa, sena sohle e ne e le thato ea Molimo (Esa. 53:10). Hobaneng? Hobane “Kreste o re lopolotse thohakong ea molao, ka ho etsoa thohako sebakeng sa rōna” (Ba-Gal. 3:13). “Hobane ea sa kang a tseba sebe, Molimo o mo entse sebe ka baka la rōna, re tle re beoe ka eena ba lokileng pel’a Molimo” (2 Ba-Kor. 5:21). “Theko e lefiloeng bakeng sa rōna! Bonang sefapanong, le fanyehiloeng teng. Shebang matsoho ao, a hlabiloeng li lipekere tse khopo. Sheba maotong a hae, a tlameletsoeng ka metsu sefateng. Kreste o jere libe tsa rōna ’meleng oa hae. Mohlomola, bohloko boo, ke theko ea topollo ea hao.”—Ellen G. White, *God’s Amazing Grace*, p. 172.

**Boima, molato, kotlo ea libe tsa lefatše—sebe se seng le seng, seo moetsalibe e mong le e mong—oetseng ho sona, Kreste sefapanong, hang fela, e le oona fela mokhoa oa ho pholosa! See se re bolella eng ka moo sebe se leng sebe kateng, hore theko e joalo e lefshoe e le ho re pholosa ho sona? E re bolella eng ka lerato la Molimo hore a ka etsa see bakeng sa rōna, le ka thoko e kholo ha kaalo?**

## Tefo ea Sehlabelo ea Nchafatso (Esa. 53:10–12)

**Ho bolela eng hore bophelo ba mohlanka ke “sehlabelo sa sebe” (Esa. 53:10)?**

Lentsoe la se-Heberu le bolelang “molato/sehlabelo sa tefo” (Lev. 5:14–6:7, Lev. 7:1–7), e ka phekolang melato e entsoeng ka boomo khahlanong le sechaba se seng (Lev. 6:2, 3). Libe tse joalo li ile tsa qolloa ke Esaia (Esaia 1–3; Esa. 10:1, 2; Esaia 58). Hape, moetsalibe o lokela ho khutlisetsa ho motho ea mo sitetsoeng seo a se nkileng, ’moho le kotlo, pele a fana ka sehlabelo sa hae ho fumana tsoarelo ho Molimo (Lev. 6:4–7; bapisa Matt. 5:23, 24). Maemong a tšebeliso e mpe ea ntho e ’ngoe ea Molimo, tefelo leba ho eena (Lev. 5:16). Joale ea ka utloisisa Esaia 40:2, moo Molimo a tšelisang sechaba sa hae se kholehong ka ho se bolella hore molato oa sona o lefiloe bakeng sa libe tsa bona. Empa ho latela tefo ea molato, ho lokela hobe le sehlabelo. Ke sena mona ho Esaia 53: Mohlanka oa Molimo, ho e-na le pheleu, o isoa hlabong joalo ka nku (Esa. 53:7) sebakeng sa batho ba khelohileng (Esa. 53:6). Leha a “khaotsoe lefatšeng la ba utloang” (Esa. 53:8; bapisa Dan. 9:26), a felisoa ka ho phethahala ke sehlabelo se hotetsang lebone la tšepo bakeng sa rōna, mohlanka o khutla ho tsoa lefung, lefatšeng leo ho sa khutloeng ho lona, ho amohela phahamiso, bona “sehlabelo” sa hae, le ho eketsa matsatsi a hae (Esa. 53:10–12).

**Sheba litemana tse latelang ka bonngoe. Ke joang temana ka ’ngoe e bontšang moaletsa oa mathomo oa Esaia 53?**

**Pes. 32:1, 2** \_\_\_\_\_

**Ba-Rom. 5:8** \_\_\_\_\_

**Ba-Gal. 2:16** \_\_\_\_\_

**Ba-Fil. 3:9** \_\_\_\_\_

**Ba-Heb. 2:9** \_\_\_\_\_

**1 Pet. 2:24** \_\_\_\_\_

**Ha e ne e ba motho e mong a ka u kopa hore u akaretse ka sekha se le seng litaba tse molemo tsa Esaia 52:13–53:12, u ne u tla ngola eng?**

## Ho Ithuta Haholoanyane:

“Kreste o jere libe tsa rōna ’meleng oa hae sefateng . . . sebe e lokela ho ba eng, ha e ba ho se motho ea fokolang ea ka etsang pheko? Thohako ea sona e lokela ho ba efe ha e ba ke bo-Molimo fela bo ka phethang? Sefapano sa Kreste se pakela motho e mong le e mong hore moputso oa sebe ke lefu. . . . Oh, ho lokela ho be le matla a boloi a matla a tšoereng kelello ea boitšoaro, a sebetsang le ho utsoa tšusumetso ea Moea oa Molimo?”—Ellen G. White, *Our High Calling*, p. 44. “Molao oa ’muso oa Molimo o ne o lokela hore e beo ile oa phahamisoa ke lefu la Mor’a ’notši oa Molimo. Kreste o ile a jara molato oa libe tsa Lefatše. Bokhoni ba rōna bo fumanoa fela ho etsoeng nama le ho lefung la Mor’a Molimo. A ka utloa bohloko, hobane o ne a fua matla ke leholimo. O ne a ka mamella, hobane o ne a se na letheba la ho hloka botšepahi kapa sebe. Kreste o ile a hlola lebitsong la batho, ka ho etsa joalo a fara kotlo ea toka. A fumane batho bophelo bo sa-feleng, ha ka lehlakoreng le leng a phahamisa molao, le ho etsa hore o hlomphuoe.”—Ellen G. White, *Selected Messages*, book 1, p. 302.

## Lipotso tsa Puisano:

**1. Esaia 53:7–9 e thehela tlase botebong ba sekoti: lefung la Mohlanka le kepele ea hae. Ke lintlha tse kae tsa litemana tsee tse phethahetseng qetellong ea bophelo ba Jesu? Matt. 26:57–27:60, Mareka 14:53–15:46, Luka 22:54–23:53, John 18:12–19:42.**

**2. Sheba qotsulo ea ho qetela ea Ellen G. White ka holimo e buang ka lefu la Kreste le phahamisang molao. O bolela eng? Ke joang re utloisisang lefu la hae e le bopaki ho se fele ha moalo?**

**Kakaretso:** Ha re se re boleletsoe ka tlhaho, boleng, le mosebetsi oa Molopolli oa Molimo, Esaia qetellong o senola tlokotsi e re fang tšepo: Ho fihlela, le ho pholosa, le ho folisa sechaba se lahlehileng, ho kenyeletsa le rōna, Mohlanka oa Molimo ka boithaipo o jara mahloko le kotlo ea rōna.